


NEWSLETTER

MART 2025

Mjesec rađanja i novih prilika!



Mart: mjesec rađanja i ispunjenja snova u Fondaciji Hastor

Mjesec mart u Fondaciji Hastor mjesec je novog rađanja, novih prilika i novih ispunjenih snova. Tokom cijele godine na našu adresu dolaze pisma iz svih dijelova Bosne i Hercegovine, iz najudaljenijih krajeva i iz velikog broja općina i gradova. Predano se posvetimo svakoj molbi koja stigne do nas. Razne su to životne priče, uglavnom teške, ali pune uspjeha i ponosa i još mnogo toga. Sve to marljive volontere Fondacije Hastor motivira da svaku od njih pročitaju s punom pažnjom, osjećajem i razumijevanjem. Upravo to činimo i ovoga marta, kada smo napravili presjek pristiglih molbi za školsku 2025/2026. godinu.



Tokom proteklih godinu dana zaprimili smo skoro 3.000 molbi i aplikacija za stipendiranje. Nakon njihovog detaljnog čitanja, spremili smo povratni odgovor za sve aplikante. Konkursna je procedura takva da će naši kandidati u narednom periodu dostavljati potrebnu dokumentaciju za rangiranje, nakon čega slijede dalje konkursne provjere i potpisivanje ugovora neposredno pred početak nove školske godine.

Vrijedni tim Fondacije Hastor čeka iznimno uzbudljiv i dinamičan period kada će naše kancelarije biti prekrivene pristiglom dokumentacijom, a mi ćemo kao i prethodna dva desetljeća dati svoj maksimum da svakom učeniku pristupimo s ljubavlju i željom za izgradnjom bolje budućnosti.

Sretno svima!

Anja Udovčić – muzički dragulj Zenice

Štipendistica Fondacije Hastor **Anja Udovčić**, mlada i talentirana violinistica iz Zenice, svojim izvanrednim muzičkim umijećem i predanošću osvaja publiku i kritiku širom regije. Anja je od najranijeg djetinjstva pokazivala sklonost prema muzici, a violina je postala njen vjerni pratitelj i sredstvo izražavanja emocija.

Nižu muzičku školu završila je u Zenici, gdje je, pod stručnim mentorstvom nastavnika, stekla poznavanje temelja muzičke teorije i violine. Trenutno pohađa završni razred više muzičke škole u klasi profesorice B. Košpo, također u rodnom gradu. Svoje prvo veliko dostignuće ostvarila je na IX gudačkom festivalu "Stringfest" u Sremskoj Mitrovici 2019. godine, gdje je, pod mentorstvom profesorice A. Bihorac, izvela kompozicije "Poljska liga" i "Koncertino op. XIV". Njene maestralne izvedbe donijele su joj pohvale i priznanja muzičkih kritičara. Ova mlada violinistica prva je violina duhovnog sastava Vrhbosanske nadbiskupije "Novo Nebo" i Kamernog simfonijskog orkestra u Zenici. Osvojila je i prvo mjesto na takmičenju "Sergei Rachmaninoff" u Sarajevu i "Primavera" u Bijeljini. Od 2022. godine Anja uzastopno učestvuje u Muzičkom kampu za mlade virtuoze, internacionalnoj inicijativi za afirmaciju i umrežavanje talentiranih mladih muzičara naše zemlje. Na prošlogodišnjim koncertima u Zemaljskom muzeju i Katedrali srca Isusova Anja je s orkestrom izvela Bahove kompozicije, kao i Kupkovičevu "Canticu slovaca".

Anja Udovčić svojim izuzetnim muzičkim talentom i kontinuiranim naporima na usavršavanju svojih vještina postavlja visoke standarde za mlade umjetnike. Kroz školovanje i umjetničke uspjehe, koji uključuju prestižna takmičenja i nastupe na važnim kulturnim manifestacijama, dokazala je svoju tehničku i interpretativnu zrelost, što je čini jednim od najperspektivnijih mladih muzičara u regiji.



Mentorstvo pod mikroskopom: mr. sc. Šejla Kotorić Keser, dr. med., o rezultatima mentorskog programa i značaju praktičnog znanja

*N*a Odjeljenju kliničke mikrobiologije u ASA Bolnici, preciznost i stručno vodstvo ključni su za uspjeh novih generacija stručnjaka. Tome svakodnevno doprinosi voditeljica odjeljenja mr. sc. **Šejla Kotorić Keser**, dr. med., te smo imali čast da upravo doktorica Kotorić Keser bude mentorica u mentorskom programu Fondacije Hastor “Prvi korak u poslovni svijet”.

Razgovarali smo s doktoricom o rezultatima mentorskog programa, ali i važnim činjenicama o kliničkoj mikrobiologiji.

Poštovana doktorice, da li ste zadovoljni rezultatima mentorskog programa “Prvi korak u poslovni svijet”?

Da, izuzetno sam zadovoljna rezultatima mentorskog programa “Prvi korak u poslovni svijet”. Program je pružio studentima jedinstvenu priliku da se upuste u praktičan rad u stvarnom profesionalnom okruženju, što im je omogućilo da steknu konkretna iskustva koja nisu obuhvaćena u okviru formalnog obrazovanja. Kroz mentorstvo, studenti su imali priliku usmjeriti svoju strast prema nauci u konstruktivne profesionalne smjerove, razvijajući ključne vještine potrebne za njihov budući rad u specijaliziranim zdravstvenim oblastima.

Kako biste opisali profesionalni razvoj studentice tokom mentorstva u odjelu Klinička mikrobiologija?

Studentica Elma je tokom trajanja mentorskog programa pokazala izuzetnu posvećenost, intelektualnu radoznalost i iznimnu sposobnost za brzo usvajanje novih vještina. Za kratko vrijeme savladala je složene mikrobiološke metode, uspješno primjenjujući teorijska znanja u laboratorijskoj praksi. Njena sposobnost da se prilagodi radnim uslovima, prepozna ključne elemente u analizi laboratorijskih izvještaja,

kao i da učinkovito komunicira s kolegama i mentorima, bila je na visokom nivou. Smatram da je njeno iskustvo u našem odjeljenju Klinička mikrobiologija bilo ključna tačka za njen dalji profesionalni razvoj, kako u pogledu tehnoloških vještina tako i u razvijanju sposobnosti kritičkog mišljenja.

Kako je izgledao mentorski program – koje su bile glavne dužnosti i izazovi mentije?

Mentorski je program bio strukturiran kroz niz praktičnih aktivnosti koje su obuhvatile sve ključne aspekte kliničke mikrobiologije. Glavne Elmine dužnosti uključivale su uzorkovanje humanog materijala, pripremu uzoraka za testiranje, izvođenje mikrobioloških testova i analiza te interpretaciju laboratorijskih izvještaja. Program je uključivao i detaljan rad najsavremenijim tehnikama, razumijevanje najnovijih mikrobioloških metoda i njihovu primjenu u kliničkom okruženju.



Koje su najvažnije procedure i analize koje se obavljaju u kliničkoj mikrobiologiji?

U kliničkoj mikrobiologiji obavljaju se različite procedure i analize koje su ključne za dijagnozu, praćenje i liječenje infekcija.

Najvažniji postupci i analize koje se redovno primjenjuju u svakodnevnoj mikrobiološkoj praksi:

- kultivacija mikroorganizama – izolacija i identifikacija mikroorganizama iz kliničkih uzoraka (krv, urin, sputum) pomoću različitih agara i medija;
- testiranje osjetljivosti bakterija na antibiotike kako bi se odabrala najefikasnija terapija za pacijenta;
- detekcija patogena putem genetskog materijala, omogućujući brzu i preciznu dijagnozu, posebno kod teško kultivirajućih mikroorganizama;
- testovi za detekciju specifičnih antitijela ili antigena, koriste se za dijagnozu infekcija poput HIV-a, hepatitisa i bakterijskih bolesti;
- mikroskopska analiza uzoraka za vizualizaciju mikroorganizama;
- testiranje na nosokomijalne (intrahospitalne) infekcije i rezistentne sojeve, kao i mikrobiološke analize okoliša u bolnicama.

Ovo su neke od analiza. Svaka od ovih analiza i procedura igra ključnu ulogu u pravilnoj dijagnozi, liječenju i prevenciji infekcija. Uspješno provođenje ovih metoda zahtijeva visok nivo stručnosti i preciznosti, jer će mikrobiološki nalazi značajno utjecati na izbor terapije i ishode liječenja pacijenata.

Koliko su mikrobiološki nalazi ključni za postavljanje dijagnoza i liječenje pacijenata?

Mikrobiološki nalazi od ključne su važnosti za postavljanje dijagnoza i odabir odgovarajuće terapije, jer omogućuju kliničarima da precizno identificiraju uzročnike bolesti i odrede najefikasniji način liječenja. Također, mikrobiološki nalazi omogućavaju pravovremeno prepoznavanje sojeva koji su otporni na antibiotike, čime se omogućava pravovremeno prilagođavanje terapije i sprečava dalje širenje otpornosti na lijekove.

Koje vještine smatrate najvažnijima za studente koji žele raditi u oblasti medicinske mikrobiologije? Imate li neku poruku za njih?

Za studente koji žele raditi u oblasti medicinske mikrobiologije ključne vještine uključuju:

1. analitičko razmišljanje – sposobnost precizne interpretacije laboratorijskih podataka i povezivanja tih podataka sa širim kliničkim kontekstom;
2. tehničku ekspertizu – duboko razumijevanje i kompetentno korištenje modernih mikrobioloških tehnika i tehnologija;
3. komunikacijske vještine – jasna i precizna komunikacija s kolegama i drugim članovima zdravstvenog tima, kao i s pacijentima;
4. kontinuirano učenje – s obzirom na brz napredak tehnologije i novih metodologija, neophodno je da stručnjaci u ovoj oblasti budu spremni na stalno usavršavanje i primjenu najnovijih saznanja.



Poruka studentima:

Ako želite uspjeti u oblasti kliničke mikrobiologije, morate biti strastveni, predani i uvijek motivirani za učenje. Ova profesija zahtijeva visok nivo stručnosti, preciznosti i odgovornosti, ali pruža i nevjerovatnu priliku da doprinosite zdravlju i dobrobiti pacijenata. Razvijajte svoje vještine, budite odgovorni i uvijek težite izvrsnosti u svemu što radite.

Priručnik koji spaja: zajednički doprinos trenutnih i bivših stipendista Fondacije Hastor



Fondacija Hastor ne samo da prati uspjehe svojih stipendista i pruža nesebičnu podršku nego i potiče saradnju trenutnih i bivših stipendista. Zahvaljujući jednoj takvoj saradnji bivših i trenutnih stipendista, nastao je “Priručnik za nastavnike njemačkog jezika”. Sama priča o nastanku ovog priručnika veoma je interesantna.

Lamija Horić-Šabić, aluministica Fondacije Hastor, stipendisticama **Farah Bajrić** i **Amini Pivić** bila je asistentica na predmetu Metodika njemačkog jezika 1. Prvo otkriće bilo je to da su povezane kroz misiju i priču Fondacije Hastor, a onda je došla i ideja o izradi priručnika. Obradujući sve metodičke izazove s kojima se susreću nastavnici njemačkog jezika u osnovnim školama, radili su razne zadatke i vježbe kako prevazići te izazove. Jedan od njih bio je i činjenica da nastavnici mora imati posebno spremljene materijale za učenike koji pohađaju nastavu po prilagođenom nastavnom planu i programu kao i za nadarene učenike, kako takvi učenici ne bi bili zapostavljeni na časovima njemačkog jezika. Učenicima koji pohađaju nastavu po prilagođenom nastavnom planu i programu sadržaji su koje nude odobreni udžbenici često složeni i nisu ih u stanju razumjeti, dok su ti isti sadržaji nadarenim učenicima često prejednostavni i oni ih rješavaju vrlo brzo. Zbog toga često dolazi do toga da ovi učenici bivaju zapostavljeni na času njemačkog jezika.

Imajući u vidu činjenicu da udžbenici koji se koriste u nastavi ne sadrže zadatke ili aktivnosti prilagođene ovim dvjema kategorijama učenika, ali i da ne postoje ni drugi izvori iz kojih bi nastavnik crpio te materijale, zaključili su da su nastavnici prepušteni sami sebi u tom slučaju i da te materijale, i pored svih obaveza vezanih za pripremu i organizaciju nastave, moraju kreirati sami.



Dakle, odlučili smo kreirati priručnik koji će sadržavati zadatke za učenike koji pohađaju nastavu po prilagođenom nastavnom planu i programu i za nadarene učenike od 6. do 9. razreda i tako nastavnicima ponuditi gotove materijale i olakšati im pripremu nastave, objašnjava Lamija.

Promocija ovog priručnika održana je u Gradskoj biblioteci u Zenici, a promotorice su bile van. prof. dr. Alica Arnaut, dekanesa Filozofskog fakulteta, i prof. dr. Amela Ćurković. Čitaonica Gradske biblioteke bila je prepuna, a atmosfera je odisala ponosom i osjećajem zadovoljstva. Jedna od najljepših stavki koje možemo izdvojiti iz ovog projekta jeste i činjenica da su sva sredstva od prodaje donirali samohranoj majci petero djece.

Lamija je bila naš kreativni motor i pokretač svega ovoga. Pomogla mi je da probudim u sebi kreativnost za koju nisam ni znala da je posjedujem, a jasno je da i dalje živi vrijednosti kojima nas Fondacija uči, a to je da budemo nesebični, da svoje znanje, postignuća i uspjehe dijelimo s drugima, *s ponosom je izjavila Amina.*



Od velikog je značaja spomenuti i upravo to da saradnja alumništa sa stipendistima Fondacije Hastor daje ogroman doprinos u jačanju same misije Fondacije Hastor. Kroz tu saradnju moguće je doprinijeti široj društvenoj zajednici, što dokazuje i ovaj priručnik.

Poruka bi bila da je sreća usrećiti drugoga, da je istinsko zadovoljstvo u dobrim djelima, da čista namjera ima najljepše ishode i da biti koristan društvu znači napredak, *poručila je naša aluministica Lamija za kraj.*

Pripremila: Aida Suljić

Poruka mjeseca

*N*a adresu Fondacije Hastor svakodnevno stižu zahvale, molbe za dodjelu stipendije, ali i poruke koje nas ostavljaju bez daha i motiviraju da nikada ne odustanemo od naše misije. Često volimo kazati da su naš najbolji rezultat naši stipendisti – trenutni i bivši.

U narednim redovima čitajte o još jednom sjajnom rezultatu...



Teško je pronaći prave riječi kojima bih upotpunosti izrazila svu zahvalnost za podršku koju ste mi pružali tokom proteklih 15 godina. Od drugog razreda osnovne škole pa sve do završetka mog master studija, bili ste uz mene, ne samo kroz stipendiju već i kroz osjećaj sigurnosti, pripadnosti i vjere u moje sposobnosti. Vaša podrška nije bila samo finansijska. Bila je mnogo više od toga. Kroz Fondaciju sam naučila koliko je važno pomagati drugima, biti odgovoran, ustrajan i vjerovati u sebe čak i onda kada je najteže. Svaka stipendija bila je podsjetnik da nisam sama, da imam nekog ko vidi moj trud i ko vjeruje u moj potencijal. Posebno sam vam zahvalna što sam, kao vaš stipendista, imala mogućnost da volontiram i budem mentor mlađim stipendistima. Kroz četiri godine rada s djecom osnovne škole, imala sam priliku dijeliti svoje znanje, pružati podršku i motivirati ih da ne odustaju od svojih snova. To me iskustvo oblikovalo i naučilo koliko je važno davati drugima ono što smo i sami dobili. Zahvaljujući vama, obrazovanje mi nikada nije bilo teret, već prilika. Imala sam mogućnost da rastem, učim i razvijam se, znajući da iza mene stoji Fondacija koja me uvijek podržava i bodri. Ne mogu opisati koliko mi je to značilo u trenucima kada sam sumnjala u sebe ili kada su prepreke izgledale nepremostive. Danas, kada zatvaram jedno poglavlje svog obrazovnog puta, osjećam ogromnu zahvalnost, ali i odgovornost da nastavim prenositi vrijednosti koje ste mi usadili. Nadam se da ću, ako Bog da, na bilo koji način, moći uzvratiti ono što sam dobila – bilo kroz pomoć drugima, bilo kroz rad koji će donijeti korisne promjene u zajednici.

Fondacijo Hastor, hvala vam što ste vjerovali u mene. Hvala vam što ste me pratili od djevojčice s ruksakom većim od nje do osobe koja danas ponosno stoji pred svojim budućim izazovima. Hvala vam što ste mi pomogli da budem ono što jesam.

S dubokim poštovanjem i neizmjernom zahvalnošću,

Fatima Zahirović, magistrica mikrobiologije, Fojnica

Foto galerija

Mart u Fondaciji Hastor



Zenica



Kalesija



Tuzla



Visoko



Sarajevo



Bugojno



Srebrenik



Fojnica



Pozivamo Vas
*da se pridružite našoj misiji i
doprinesete ispunjenju snova
perspektivnih učenika i
mladih ljudi koji trebaju našu
pomoć.*



Ukoliko želite podržati rad Fondacije Hastor,
uplatu donacije možete izvršiti na jedan od transakcijskih računa:

ASA Banka d.d. Sarajevo:

1346101000825159

Raiffeisen Bank BH d.d. Sarajevo:

1610000055230065

Unicredit Bank d.d. Sarajevo:

3389002201775656



Kontaktirajte nas!

Bulevar Meše Selimovića 16,
Sarajevo
033 774 789
033 774 823
fondacija@hastor.ba



Redakcija

Dženana Zulum
Lorens Stranjak
Aida Suljić



Grafički dizajn

Sara Keserović
Adnan Kevrić
Sara Pitić